

Gairm

latha 's latha seachad is chà robh a shao d' air a' chairt mo ruigheachd. Air a' cheann thall ràinig i a ceann uidhe agus sgrìobhte oirre ann an litrichean dearga—"Not for Dublin. Try where posted!"

An déidh Baile Bhóid bha Sruighlea agus fhuair mi a' cheud duais air son leughaidh agus aithris. Fhuair mi duais an leughaidh a' bhliadhna roimhe sin agus sguir mi dheth an déidh Shruighlea. Chuir mi aithne air Niall MacLeòid, am Bàrd Sgitheanach, aig Mòd Shruighlea—duine uasal gasda a bha an còmhnaidh a' misneachadh ghille an òga mar bha mise aig an àm.

Goirid an déidh a' Mhòid sin chaidh mi air cuairt-chuain gu Muir a' Mheadhon-Tìre far an do chuir sinn seachad mu ochd mìosan. Thadhail sinn ann an còrr is trì fichead baile puirt; 'nam measg bha Naples bho an deach mi gu Pompeii, am baile sin a chaidh a sgrìobhadh mu cheithir fichead bliadhna mun do rugadh Crìosd, an uair a bhrùchd Vesuvius thairis agus a chomhdaich i am baile cho tur agus nach d' fhuair a mach e gu ochd ceud deug bliadhna 'na dhéidh. Ann am Venice bha *gondola* agam dhomh féin g'am thoirt air tìr gach maduinn a' dol fo Dhrochaid na h-Ochanaich chun a' mhargaidh. Bho Piraeus chaidh mi trì uairean gu baile na h-Aithne; sheas mi air Areopagus agus chuir mi mo chas, far an do chuir na muillionan romham, air làraich coise an Abstoil Pòl. Ràinig sinn cho fada ri Baile Mór an Turcaich agus chaidh an sgiobair, Ailean MacThòrcadail, is mi fhéin a dh'fhaicinn na h-eaglais ainmeil, Santa Sophia. Tha e mar fhiachaibh orrasan nach eil 'nan luchd-leanmhain air Mohamed am brògan a chur dhiubh, ach air son goireas luchd-turuis tha cuarain mhóra aca anns an teid a' bhròg as motha agus thugadh sin dhuinn. Cha deachaidh sinn fada air ar n-aghaidh an uair a mhothaich mi fhéin buille fann air mo ghualainn agus có bha an so ach aon de'n luchd frith-ealaidh agus mo chuarain aige 'na làimh. Cha d'fhairich mise gun d'fhàg mi am dhéidh e! A thaobh is gun deach sinn cho fada co-dhiubh air a' chuairt-chuain sin chaidh sinn a mach am Bosphorus is b'urrainn dhuinn a ràdh le firinn gum fàca sinn a' Mhuir Dhubh.

Bha Gàidhlig aig a' chuid bu mhotha de'n sgioba agus mar sin cha robh eagal gum fàsadh neach meirgeach innte. Bha earran litreachais a' Mhòid an còmhnaidh air m'aire-sa agus bhithinn a' cur rannan ri chéile mar a gheibhinn cothrom. Bha sinn uair air acair mu choinneamh baile beag do an ainm Itea anns a' Ghréig, am baile puirt as fhaighe air an àite iomraiteach, Delphi, far am biodh na sean Ghréigich ag aoradh do Apollo. Tha an teampull 'na seasamh an sud fhathast. Bu mhotha mo thlachd-sa, ged thà, a bhith a' coimhead air Beinn Pharnasuis a tha ag éirigh còrr is ochd mìle troigh air cùl a' bhaile bhig so. Bhiodh e dàna a ràdh gun tàinig mi fo bhuaidh na Ceòlraidh ach is ann an uair sin a thòisich mi air sgrìobhadh an duain, "A' Chuairt Mhaidne," leis an do choisinn mi a' cheud duais aig Mod 1912. Air son Mòid 1911 thugadh dhuinn, mar chuspair, "Am Mòd," agus b'èiginn tòiseachd as ùr air a' chuspair sin. Shoirbhich leis an fhear sin mar an ceudna agus tha iad le chéile air an clò-bhualadh anns "An Deo Gréine."

Air dhuinn tilleadh air ais gu Cluaidh chaidh sinn air son dà mhìos gu taobh an iar na Hearadh, gu Amhuinnsuidhe, far an do